

## Mois du Don 2022: Hëlleft eis ze hëllef!

### ► Section locale

**Vum 1. bis den 30. Abrëll 2022 organiséiert d'Lëtzebuenger Rout Kräiz de *Mois du Don*, dat grousst Evenement, bei deem vill Benevoller sech dofir asetzen, Spenden ze sammelen.**

Zanter zwee Joer ass eist Liewen duerch d'Covid-19-Pandemie op der Kopp, eng Pandemie, déi Spueren hannerlooss huet. Si huet net nëmme Kranker getraff, mee och Deeler vun der Bevëlkerung, déi elo mat wirtschaftlechen a psychologiesche Problemer konfrontéiert sinn, zu Lëtzebuerg, wéi am Ausland. Während dem ganzen Abrëll mobiliséiert sech déi lokal Sektoun Gréiwemaacher vum Roude Kräiz an Ärer Gemeng, fir d'Aktivitéite vum Lëtzebuenger Roude Kräiz z'ënnerstëtzen.

De *Mois du Don* ass eng immens wichteg solidaresch Aktioun, bei där Spende gesammelt ginn, déi et dem Lëtzebuenger Roude Kräiz erméiglechen, seng Aarbecht weiderzeféieren an deenen ze hëllef, déi Hëllef brauchen. 2022 besteet weiderhin e ganz grousse Besoin un Hëllef, an och Dir kënnt hëllef, egal wéi héich Ären Don ass. All eenzelen Don zielt!

Am Abrëll ass déi lokal Sektoun vun Ärer Gemeng aktiv a wäert op lech zoukommen, fir d'Aktivitéite vun dem Lëtzebuenger Roude Kräiz ze ënnerstëtzen. „*De Mois du Don* ass net nëmme eng solidaresch Collecte vu Fongen, et ass och d'Geleeënheet, fir op d'Awunner zouzegoen an hinnen déi wichteg Aarbecht vum Roude Kräiz a seng Wäerter ze presentéieren,“ ënnersträicht den Guy Cognioul, President vun der lokaler Sektoun vu Gréiwemaacher. „*No zwee Joer Kris ass et immens wichteg, sech solidaresch a generéis ze weisen. Mir mobiliséieren eis méi ewéi jee fir deenen zur Säit ze stoen, déi eis Ënnerstëtzung brauchen!*“

No zwee Joer Pandemie besteet um sozialen a psychologiesche Plang en Noutstand. Och wann ee vun dëser Kris relativ verschont bliwwen ass, wëll een einfach e Schlusstréch zéien. Fir wirtschaftlech geschwächte Leit bleift d'Situatioun awer weider ugespaant, wa si Decisiounen iwwer hir dagdeeglech Grondausgaben huele mussen. Och déi Jonk goufen haart getraff, hiert soziaalt Liewen an hir Zukunftsaussichte goufen op Äis geluecht. D'Lëtzebuenger Rout Kräiz huet hiert Bescht gemaach, fir hinne beim Opbau vun hiren Zukunftspläng ze hëllef a se psychologiesch ze ënnerstëtzen. A vergiesse mer och net, datt d'Solidaritéit iwwer d'Grenze vu Lëtzebuerg erausgoe muss! Sou zum Beispill an der Ukrain, wou d'international Solidaritéit extrem wichteg ass fir d'betraffe Familljen, d'Fraen a Kanner, an all Affer vum arméierte Konflikt ze hëllef. Aner geografesch Gebidder, besonnesch an den afrikanesche Länner südlech vun der Sahara, an deenen d'Lëtzebuenger Rout Kräiz zanter Joren aktiv ass, wäerten nach méi laang ënnert de Follge vun der sanitärer Kris leiden. Loosst eis deenen, déi dohanne liewen, hëllef, zu engem wierdegen, normale Liewen zeréckzefannen.

### **Wéi kann een d'Rout Kräiz während dem Mois du Don ënnerstëtzen?**

Dir hutt verschidde Méiglechkeeten, lech während dem Mois du Don mat enger Spend solidaresch ze weisen:

- wann déi lokal Sektoun aus Ärer Gemeng op lech duerkënnt, sief et doheem oder bei lokalen Evenementer;
- mat enger Iwwerweisung op de CCPL LU52 1111 0000 1111 0000 (Kommunikatioun: Mois du Don 2022);
- mat Ärer Bankekaart op [www.moisdudon.lu](http://www.moisdudon.lu);
- mat engem Uruff op d'Nummer 2755.

Während dem Mois du Don hannerloossen d'Quêteure vum Lëtzebuenger Roude Kräiz bei hirem Passage eng Matdeelung, an där Dir all déi néideg Informatiounen fannt, fir Ären Don ze maachen. De Mois du Don gëtt och a verschidde Medien an op de soziale Reseauen annoncéiert, och hei hutt Dir d'Méiglechkeet, en Don ze maachen. Späert Är Aen op a weist lech solidaresch! An ofschléissend kritt Dir an der leschter Woch vum Abrëll e Brëf vum Roude Kräiz fir lech Merci ze soe fir Är Ënnerstëtzung.

**Mir zielen op lech!**